

堅

瓠

集

堅瓠續集卷之三目錄

寓簡論易

未見錄

朝鮮試文

食棗商黃

文士苦心

文公好學

文信國

謁壽星

毛老人

忍爲通寶

田駿醉歸

孝童

物作人言

物有人心

紫泥封

牢丸

露布

戊辰榜

孝廟人材

詩誇家世

步輿

陳仲子墓

雨魚

雨異

雨錢

火浣布不朽木

擬人聖賢

陳希夷對御歌

阿湍堆

項氏語讖

鬼畏正人

河神

文昌經治疫鬼

太守執柯

人皮鼓坐褥

戚繼光猴

蛇菩薩

蠶神

宮巷濂溪坊塔

異鏡

唐文襄

八歲善對

陳杜拾遺

將鬚刺眉

秀才張妓

楊李潘治第

試院鶴跡封

水雷繪梅

石中物

雷鳥雷神

玉脂燈臺

陰德不在遠

孔孟所使

琴力酒量

兄弟別號

人腹鼠蟹

吳中異人

圓珠殼

楊鐵崖

盆景

石號

堅瓠續集卷之三

長洲石農褚人獲學稼纂輯

寓簡論易

宋沈作喆著寓簡十卷其論易多佳語如
極否時能約已厚下則否傾爲益取否上
一爻而益其下非益乎交泰時或剝下奉
上則泰過爲損取泰下一爻而益其上非
損乎雖益三也損下而益上斯爲否三矣

雖損☵也損上而益下斯爲泰☵矣蓋天下治亂戒其損益而已

未見錄

天都載載屈諫著未見錄中多佳語如泰太也世治太甚而將反也故聖人處泰而益懼又曰唐五行志云取財過度則陰失其節而水溢母氣虛則子氣洩也又曰五行之氣其一旺者其一衰故土木之工興

而金必竭况一衰而二旺乎諫又著荅客
問一書其中商確時務亦多可採是必留
心經世者惜不載其何時何地人

朝鮮試文

馬仲履曾見朝鮮試文其二論一謂漢高
祖置太公於俎上而不顧而乃爲義帝發
喪是豈移孝爲忠之道一謂韓退之不得
遂行道之志故感二鳥而作賦初非有羨

光榮之心二說皆可味

食棗齒黃

養生論齒居晉而黃註不能解近觀醫說引遜齋閒覽云倪彥及宦太原云土人喜棗貴賤老少嘗置棗於懷袖間等閒採取食之緣食棗故齒多黃叔夜所謂齒居晉而黃是也吾子行曰晉人喜食棗若粵人之啖檳榔味甘傷脾故齒黃也

文士苦心

司馬長卿作賦意思蕭散不復與外事相
接沈約有攢心之僻曹植有胃反之論任
末削荆爲筆剋樹汴爲墨夜依林木望月
映星左太冲門庭溷廁皆置筆硯周大朴
作詩屬思不續墜落坑塹不覺朱唇吞紙
實腹抱犬而卧孫敬折柳寫經睡則懸頭
於梁鄭灼患熱以瓜鎮心便起誦讀崔浩

留心經術至夢與鬼爭議崔融爲文下直
馬過其門而不覺孟浩然終日苦吟眉毫
盡去賈島馬上推敲誤衝京兆節而不知
王摩詰苦吟至走入醋甕是皆文士苦心
猶云夫子發憤忘食之意至楊子雲賦甘
泉研精殫思夢腸出而殉郭路定舊說絕
於燈下李廣勤學使心過度心神辭去而
沒鄭叔依陽道州讀書月餘與論國風叔

不能往復一辭遂縊陶冶性靈何至以身
殉之風雲月露幻出一座北邙山諸公直
是癡漢宜乎梅聖俞笑老兵醉卧爲快活
老兵不識字爲更快活也

文公好學

楊誠齋貽朱晦庵書曰得書知股肱之疾
移及腹心是在醫法顧不察耳臟神不曰
孰使我饑渴之不懈者非書耶孰使我劇

自鏤心椎胸摺腎者非書耶某屢陳囊視
檀筆之方而以水投石諗知酷嗜在此又
戲跋晦菴楚詞解云注易箋詩解魯論一
帆徑度浴沂天無端又被湘纍一作靈喚去
看西川競渡船按傳燈錄大耳三藏具他
心通南陽忠國師欲驗之三藏云國師是
大善知識何得在西川看競渡誠齋用此
以戲之

文信國

文信國天祥既赴義是日大風揚沙天地
盡晦咫尺不辨自後連日陰晦宮中皆秉
燭羣臣入朝亦列炬前導世祖悔之贈公
太保中書平章事廬陵郡公隨設壇致祭
丞相孛羅行初奠禮忽狂飈旋地起吹沙
滾石不能啟目俄捲其神主於空中隱隱
雷鳴如聞怒聲天色愈暗乃奏改前宋少

保右丞相信國公天復開霽此事甚奇見
鄭龍如偶記而正史及公集皆不載

謁壽星

偶記載巴陵老人年百八十歲時觴客舉
樂毛侍御過其地聞之乃屏騎往觀見堦
前數人皓首蒼顏年可百歲不知孰爲老
人也問之則皆老人子老人後出問客何
姓名侍御云姓毛名伯溫特來謁壽星耳

老人愕然良久曰是矣侍御問所以老人
曰某幼時遇劉伯溫相言汝當百八十歲
後有客與我同名者來汝逝不遠矣觴罷
客散老人果沐浴而卒

毛老人

明初朝覲凡州縣老人亦與焉高皇因問
老人曰朕築室後湖藏天下黃冊當作何
向一人曰當東西相向早晚日晒庶無濕

潤高皇大喜問姓名對曰毛某高皇賜酒
飯曰汝言有理免汝守之俾無鼠患遂引
至後湖埋之故雖有鼠而黃冊無恙弘治
間戶部郎中東莞鄧琛嘗坐後湖廳事見
一老人揖曰吾爲朝廷守冊百四十餘年
一冊不爲鼠傷未蒙管冊諸公隻雞斗酒
之賜恐非所以待有功也言訖不見鄧具
牲醪祀之後以爲常或曰老人新會人也

忍爲通寶

忍之一字天下之通寶也如與人相辯是非這其間着個忍字省了多少口舌如與美女同眠這其間着箇忍字養了多少精神如宮室車馬衣服這其間着箇忍字節了多少財物凡世間種種有爲纔動念頭使惺然着忍如馬欲逸應手加鞭則省事多矣但忍中有真丹又是和之一字以和

運忍如刀割水曾無所傷和者衆人見以
爲狂風驟雨我見以爲春風和氣衆人見
以爲怒濤我見以爲平地乃謂之和耳

田畯醉歸

人得優游田畝身心無累把盞卽酣誠生
人之佳趣高蹈之雅致也若豐筵禮席注
玉傾銀左顧右盼終日拘攣惟恐有言語
之失拱揖之悞此則所謂囚飲張亨父泰

題田畯醉歸圖云村酒香甜魚稻肥幾家
留醉到斜暉牧奴拽背黃牛載兒子旁扶
阿父歸髻短何妨花插帽身強不厭布爲
衣天寬帝力知何有但覺豐年醒日稀讀
之令人有物外想

孝童

樵書順治癸巳四月泰安州守策馬泰山
下仰視天嶺交氣尺五相懸忽見一片白

雲自山巔搖曳而下中有一人端然正立
守以爲仙也停驂道左與從者望雪羅拜
飄然墜地一童子也總角巾兮翩然如畫
守驚問之童曰兒姓孔聞之母氏兒之祖
是聖人兒十齡矣母病不可起私祝泰山
願隕身續母壽母幸愈故赴捨身巖上以
踐夙言不意其至此也守敬異之以所乘
輿載童子併輿粟肉資送以歸

物作人言

鸚鵡鵲秦吉了皆能人言角端猩猩能
人言晉惠時江夏張騁所乘牛人言犬人
言夸堅志鄱陽汪三宰牛牛亦人言又石
門羊屠家羊人言金樓子載西周之犬能
言朱休之宗楚客余三乙張林家犬皆人
言又嚴遵美猫犬相對人言鄱陽龔紀猫
人立而言荆南之虎人言盧傳素馬人言

唐路巖馬亦人言夢澤之鹿人言南唐苑
中鹿亦人言于闐野豕人言渭南主人猪
亦人言駝坊使臣橐駝相對偶語周南家
鼠人言晉安鼠能咏詩孫吳時永康龜人
言嘉靖間楓橋瘍醫龔家大龜亦人言耳
談載嚴州鰲人言宋處宗羅含鷄皆能人
言紹興時亳州魏翁雞能人言有人雞莫
萬曆初史文學家母雞作人言宋乾道初

虎丘之鵲人言華表之鶴人言東都龍門
僧桐華上蜂作人言相慰勉天寶間宣城
劉成舟中蟹呼佛當塗李暉舟中魚群呼
佛至揚州蘇隱風能讀時房宮賦更奇

物有人心

鸚鵡能問上皇野賓能識仁裕烏龍知陸
逆僕燕子獨伴孀妻駿馬終殉名將吉了
不願入夷里烏報效孝子白龜脫難酬恩

舞馬不順祿山供奉跳擊朱溫崖上白馬
悲號墜水元季五象不拜明太祖下至蝼
蛄蠅蟻皆能感不殺之恩出垂死之地物
類之有人心者可以媿天下無義氣丈夫
○萬花金谷載明廣西有象封定南公吳
三桂入橫欲將象解京象昂首直觸象奴
百計勸勉終不服三桂大怒刀矢不能傷
以火砲攻斃之此可與唐元義象並傳

紫泥封

漢詔書多稱紫泥封武帝元封中浮析國貢蘭金之泥此金出湯泉盛夏之時水常沸湧有若湯火飛鳥不敢過有人冶此金爲器皿金狀混混若泥如紫磨之色其金百鑄色變白有光如銀卽銀燭也帝以此泥封諸函匣及諸宮門鬼魅不敢干當上將出征及使絕域多以此泥爲璽封蘇武

衛青等之使皆受金泥之璽封也武帝崩
此泥乃絕○隴右記紫泥出階州武都郡
牢丸

丹鉛錄引束皙餅賦有牢丸之目蓋食具
名也東坡以牢丸具對真一酒偶語雖工
然不知牢丸具爲何物後見西陽雜俎引
伊尹書有籠上牢丸湯中牢丸註云牢丸
今湯餅也並無牢丸具貪竒趣韵雖東坡

亦不免考歸田錄引餅賦有饅頭薄持起
洩牢久之號薄持荀氏謂之薄夜起洩牢
久皆莫曉爲何物又見一書引餅賦終歲
飽施惟牢九乎觀此則牢九未嘗無本欠
或誤爲九九或誤爲九亦未可知○寒具
寒食具也楚詞所謂餽餽及糗粢蜜餌卽
今燒餅與油餠之類齊民要術作環餅

露布

隋禮儀志後魏每攻戰克捷欲天下知聞
乃書帛建於漆竿名露布其後因之按漢
桓帝時五侯貪縱李雲露布上書賈洪爲
馬超伐曹操作露布桓溫北征袁虎倚馬
撰露布蓋古者文書不封而應告中外者
皆曰露布自元魏以來專爲捷書爲以練
帛建於涼竿是露布前此已有之書用揭
竿始於後魏

戊辰榜

弇州外紀正統戊辰榜中四閣老二冢宰
以爲盛事然而閣中有萬安遂便一榜無
色未若隆慶戊辰四百人之內揆席七人
八座十五人卿貳三十八人開府二十人
方伯十九人其餘衣緋懸金者一百五十
餘人自有制科已來未有擬其盛矣正統
爲彭少傳時劉少保吉劉少傳珣及安王

尚書恕尹尚書旻隆慶爲沈少傳一貫朱
少保賡趙少師志皐張少保位于少保慎
行王東閣家屏陳少保于陞

孝廟人材

弘治間西曹有對云一雙探花父兩箇狀
元兒時張宗伯昇己丑狀元子恩王禮侍
華辛丑狀元子守仁俱兵部主事又戶部
郎中劉鳳儀則己未探花龍之父兵部員

外李瓚則壬戌探花廷相之父又壬戌魯鐸榜復有永平魯鐸有兩朱袞一美貌一貌不揚時有對曰魯鐸分南北朱袞別妍媸又弘治丙辰科進士有孟春季春夏周周鼎李西涯卽席出對云孟仲季春惟少仲諸進士無能屬者西涯復云夏商周鼎獨無商是雖資謔而一時人材之衆科第之盛朝廷雍熙之象于斯可見

詩誇家世

祝瑄美言其尊人曾手錄一詩盛誇家世
之赫奕官職皆係明代然狀元不及百人
三代回朝者絕少作者姓名終未能得也
詩云特報黃堂太守知小兒今忝狀元回
家兄御史山東道舍弟郎中福建司伯父
舊年陞冢宰嚴親今歲轉尚書不才久已
叨黃甲願假人夫一片時

步輿

張江陵再起時所過州邑鄣傳牙盤上食
水陸過百品江陵猶以爲無下筯處至真
定太守錢普無錫人能爲吳饌江陵甘之
曰吾行路至此僅得一飽餐此語一聞諸
郡縣轉相效尤吳中之善庖召募殆盡普
又創步輿供奉前爲重軒後爲寢室以便
偃息傍翼兩廡廡左右各令一童子侍爲

掉箠注香用卒三十二人舁之

陳仲子墓

鄭龍如雋區載長山古於陵地志稱仲子墓在焉歲久無踪張明府文龍遍跡之於西市居民園中得一坏壘詢父老暨文學經紳皆指爲是乃捐俸易地壘土置碑題曰於陵仲子之墓建祠墓側舊未有祠仲子者張旣輯祠欲歲時享祀之思仲子廉

且不受餐於母兄安得伯夷之粟粟之乃
以歲時文廟祭享撤所獻孔子大羹一盂
佐以李栗釋奠如禮著爲令春秋無改焉

雨魚

漢書鴻嘉四年雨魚於信都長五寸許唐
書元和十四年二月晝有魚隕於鄆州述
異記雍州雨魚長八寸許庚申外史至正
二十五年六月大都雨魚長尺許人皆取

食之明嘉靖壬戌三月二十三日山東德州雨魚三日輟耕錄志云天雨魚人民失所之象天都載載萬曆丁酉楚王府後有長春寺遠以澄湖湖與外河通寺前蓮臺忽龍起蓮葉間雨如傾魚皆乘水上升從雲中散落百里山家家獲魚少陵詩驟雨落河魚此誠理所有者但正史所載天雨魚甚多未可槩視爲河魚散落也

雨異

雨金雨粟雨稻雨米雨麥雨黑黍雨紅苽
雨魚雨棗雨灰雨塵雨沙雨土雨毛雨血
史書所載異矣漢宣帝時宮中雨蒼鹿綬
而食之味甚美永光二年大雨草而葉相
樛結王莽時宮中雨五銖錢墜地悉爲龜
後漢建和三年七月北地雨肉似羊肋劉
聰時平陽雨肉廣二十七步魏文帝時安

陽殿前雨朱李人噉之數日不思食河間
王子元家雨小兒八九枚墜地皆長六七
寸晉張仲舒在廣雨羅箋甚多梁武帝時
殿前雨雜色寶珠唐貞元中南木於陳留
長五寸許乾符中洛陽雨一物墜地如羖
羊朱紹興中汴京雨水龜數十里大小皆
具首足卦文明弘治庚戌三月慶陽雨石
無數能作人言聽之歷歷可辯見秦疏

雨錢

漱石閒談嘉靖六年六月十九日京師雨
錢惟軍職官屋上爲多成化丁酉六月九
日京師大雨南中徃徃得錢錢皆側倚瓦
際王文恪公有詩紀其事云蒼天似憫斯
人困故向雲中撒與錢錢若了時民又困
何如只賜與豐年誦此詩亦少陵安得廣
厦千萬間大庇天下寒士俱歡顏之意

火浣布不朽木

說圃識餘廣東林習孔曾示一衣云是火浣布乃火山之鼠毛織成者穢則以火煨之穢去而衣不焚蜀中有不朽木出建昌道彼中守巡入省則持以饋僚友云出于火山好事者取其木作爐或以皮揉作繩雖經烈火毫無損焉然以水濡之則易腐正所謂利於火者不利於水也

擬人聖賢

人稱黃憲曰子國有顏子稱謝尚曰此兒
座之類回人稱張華爲當今之顏子郭
奕稱羊祜爲今日之顏子周續之通五經
并緯候亦有顏子之號梁主以伏挺爲顏
子陳惠雲法師以徐懷爲顏子漢人稱張
霸爲張曾子梁人稱滕曇恭爲曾子隋人
稱裴叔卿爲裴曾子王衍自比子貢而譙

周門人稱羅憲爲子貢文立爲顏回陳壽
李密爲游夏雖當否未可知而語皆相類
至唐文宗詔畫王起像於便殿號常世仲
尼恐與之大過矣

陳希夷對御歌

陳希夷持居雲臺觀日多閉門獨卧累月
不起周世宗召入禁中局戶試之月餘始
開搏熱睡如故對御歌云臣愛睡臣愛睡

不卧戲不蓋被片石枕頭簔衣鋪地震震雷
掣雷鬼神驚臣當其時正鼾睡閒思張良
閃想范蠡說甚孟德休言劉備三四君子
只是爭些閒氣怎如臣向青山頂上白雲
堆裏展開眉頭解放肚皮且一覺睡管甚
玉兔東升紅輪西墜

阿彌堆

驪山有鳥名阿彌堆唐明皇御玉笛將其

聲翻爲曲名爲阿溫堆左右皆能傳唱故
張祐詩云紅葉蕭蕭閣未開王皇曾幸此
官來至今風俗驪山下村笛猶吹阿溫堆
明皇驕淫侈靡耽嗜歌曲以至於亂世代
雖異聲音猶存詩人懷古乃有猶吹之句
而此鳥之名殆將與世不朽又賀方回長
短句亦云待月上潮平波艷塞管孤吹新
阿溫

項氏語識

項水心煜初進徐氏華厝畜賀禮中鵝群
于池一日偶暇憑闌間玩見遊泳自得謂
其子某曰暢哉鵝羣如人之初居華厝也
乃子素性騃戇矢口答曰末後一羽亦是
其受用聞者相傳爲笑豈知竟成語識又
進屋時待匠匠恨其苛刻祝曰與國同休
似祝而實詛聞革時鄉人付之烈焰

鬼畏正人

史稱縣令方正縣妖破膽至相率遠徙廣
異記載晁良正掘地得太歲鞭之三日而
不敢禍文海披沙載王老福盛鞭太歲數
百而不讐報江涇顧老獷悍僂豪金神七
煞被其觸傷至盜寺油塗瘡而不敢犯聲
雋載吳縣錢翁橫福正盛取七煞釘椽上
而不敢殛相傳崑山無七煞爲顧文康公

母戲植椿擊滅洞庭山無胥神爲王文恪
公所驅除乃知福祿盛者鬼神皆畏之

河神

金龍大王係浙江山陰諸生姓謝名緒太
傅後裔元兵入臨安謝憤主蒙難赴江死
尸僵不壞鄉人義而葬之數有靈異誓必
滅賊衆卜何徵乩曰以河逆流爲信明高
皇伐元與元左丞戰呂梁洪河水果逆流

見空中有神兵助戰高皇遂建祠洪上永
樂間鑿會通河舟楫過者禱無不應隆慶
間潘季馴治漕河河塞不流爲又責之數
日河流漕舟賴以安行者三百餘年順治
間金華朱公之錫爲總河正直慈惠聞歿
後爲河神行舟水手時見公戎服紅燈侍
從往來河上其靈應亦復如謝幽冥事不
可知亦如陽官之陞遷調易歟

文昌經治疫鬼

天啟中蜀明時舉爲廬陵令值邑中疫大作明刻一經條似封條樣上寫玉清文昌大洞仙經取道士印鈴於上散病人家貼門上病者卽愈未病者不染有三家同居左右皆病居中者貼經條得免已而鄉村中疫得經條貼門香供者皆免人咸異之問於明明曰文昌父母皆死於疫及得道

乃法治疫鬼鬼名元伯伏罪曰下方人有
罪業上帝命閭君與元伯等奉行誥毋滅
我願聽約束但有經號在門卽不敢入已
八卽出然則文昌經洵當奉持也

太守執柯

吳中湯來倩先生逢元乃翁家貧以老諸

生僦居學舍來倩幼而好學萬曆乙卯年
十八以童子試受知於郡守陳蓮湖訐謨

時有歸寡婦與弱女同居族有猾者肆虐
於寡欲以其女爲太僕吳因之先生默小
星女不從迎女者已在門遂至成訟守廉
得其情呼問寡婦若旣不願以女爲宦家
側室我爲若執柯配一士子使女他年受
冠帔可乎婦諾之守取俸銀六兩內衙出
幣二端爲聘隨召來倩至合巹成禮撤黃
堂儀從鼓樂喧闐送歸學舍廣文君咸出

高燈迎之明年補邑庠生郡人傳爲嘉話

人皮鼓坐褥

湧幢小品載北固山佛院有人皮鼓世廟時湯都督沂東克寬戮海寇王艮皮鞞之其聲比他鼓稍不揚蓋人皮視牛革理厚而堅故聲不如他鼓也又皇明雜記載韓觀提督兩廣殺人甚多以人皮爲坐褥耳目口鼻顯然髮散垂褥首披椅後

戚繼光猴

異識資諧正德間山東有仙降某家爲人
談休咎甚驗而未嘗示形自名爲毛仙云
戚大將軍繼光父某與之游甚狎忽一夕
去更二十日乃來問之荅曰聖天子將南
幸先期金甲神爲清道是神嚴厲吾曹遇
之無生理故暫避之問避何所對曰匿泰山
某巖石底耳後二年武宗果南巡繼光

堅瓠續集

卷三

三

續

父與言吾與若好密胡不示吾形似羞怩不肯固強之僅示一手毛長如許蓋白猴也已而歎曰公知我矣我數已盡且將長別繼光父悔乃曰我終不能離公家未幾而繼光生有臂力而臂多毛始知爲毛仙所托胎也李如樟爲記其事

菩薩蛇

京師西山寺有二青蛇大者長五丈餘小

者長四丈餘有人至寺僧必呼蛇以酒肉
飼之二蛇輒啖略不畏人僧令人遶蛇身
一過謂之不絕人身號曰菩薩蛇萬曆初
年太倉王相公女號曇陽子亦有巨蛇隨
之名曰護龍王鳳洲有曇陽子傳○閩三
平寺乃大顛法師闡教之地有大蛇不傷
人名曰蛇侍者凡有祭賽布金不至蛇侍
者詣其家索之度市越津一無畏避

蠶神

蠶家所祀先蚕之神實馬頭娘也高辛時蜀有夫在外久不歸妻誓曰得夫歸者以女妻之家有一馬聞而躍去數日夫乘馬歸馬嘶不已夫審其故曰人豈與馬配耶紋馬曝皮於庭女過皮傍皮忽捲女飛去掛於桑土遂化爲蚕食桑葉作一繭大如甕後人塑女像爲馬頭娘以祈蚕焉

宮巷濂溪坊塔

郡中宮巷有塔高丈餘合圍約七八尺塔頂乃鐵鑄者然兩三人於下搖之則擺動如樹木然鈴鐸自鳴蓋其下必有機軸而神匠之所遺巧也又濂溪坊有小塔正與宮巷口相對故老曰昔年烟霧中以紅綠線在塔之半截處兩人拽之橫牽可過並無窒礙後有異人識破不復可牽矣

異鏡

金陵瑣事載馴象門外操軍某耕田得鏡
半面照之能見地中物持之偷墳掘埋無
有不獲後以事犯鏡沒入應天府庫中又
大中橋陳某修理墻垣得一木匣中藏長
柄小鏡照而則頭奇痛遍與人照無有不
痛者以爲妖物舉而碎之文海披沙載秦
始皇鏡照見人心膽嘉陵漁人網得一鏡

照人悉見五臟見者輒嘔吐王度有鏡照見精魅徐鉉得一鏡照人只見一眼宗壽有古鐵鏡照見青衣小兒坐酒樓上謝在杭之彭城逢市上鬻一鏡面照如常背照人影倒見願頰向上當時傳觀驚駭此無他異蓋鏡背必凹凹則人面倒見也

唐文襄

蘭谿唐文襄

龍

建花園於東門外自爲記

末云有吾與點也之意後園爲柳憲副希
點所得園丁每稱有冠服貴人現形作崇
希點心知之一日至園聞唐在空中厲聲
曰此園吾大費經營何物後進乃欺予孤
見奪耶希點揖而言曰所以敢市此園者
亦以公有遺言在爾唐問何言希點曰公
忘却記中有吾與點也之句乎唐俛首滅
形後不復現

八歲善對

廣莫野語載待詔周清誠八歲時鄰人見
晒麴屋上者出對曰屋上直晒三行麴誠
應曰門前低叫一聲糕造賣糕者過也又
姨夫與父遊山下船二人齊脫衣出對曰
兩箇姨夫齊脫衣想是連襟誠卽對曰一
雙女婿各拜節果然男坦

陳杜拾遺

陳子昂閬州人閬州有陳拾遺廟訛爲十
姨遂更廟貌爲婦人像崇奉甚嚴温州有
杜拾遺廟後亦訛爲杜十姨塑婦人像里
人以五髭鬚相公無婦移以配之五髭鬚
者卽伍子胥也拾遺之官誤人身後如此

捋鬚刺眉

墨客揮犀宋彭淵材見范文正公畫像驚
喜再拜稱新昌布衣彭几幸獲拜謁熟視

曰有奇德者必有奇形乃引鏡自照又捫其鬚曰大畧似之矣但無耳毫數莖耳年大當十相具足也他日至廬山太平觀見狄梁公像又前再拜贊曰宋進士彭几謹拜謁復熟視久之見其眉目入髻呼刀鐸者使刺其眉尾令作卓枝入髻之狀家人輩望見驚笑淵材怒曰何笑我前見范文正公恨無耳毫今見狄梁公不敢不刺眉

何笑之有

秀才張妓

秀才張者教坊妓也頗能引文調詞而興止亦閑雅遂獲此號嘗至琴川錢方伯館之比至錫山秦封君亦屬意焉一日秦公燕客戲之曰汝往來琴川錫山於錢秦二公之間事齊乎事楚乎張方舉魚笑曰魚我所欲也能掌亦我所欲也一座稱賞

楊李潘治第

丁謂治第京師鉅麗無比軍卒楊杲宗者躬畚鍤之役勞苦萬狀後杲宗以外戚起家晉公貶崖州卽以其第賜之明嘉靖間大金吾陸炳於京師起第軍人李偉親負土石不二十年炳敗籍其居入官而偉女入宮封貴妃萬曆卽位尊爲慈聖皇太后亦以炳宅賜偉明末予親潘先輩治第規

模宏敞有張某者日鬻魚於潘以供匠作
之需暇則佐工因進言某處應若何寬轉
某處應若何曲折潘頗納之入國朝潘
口貧張日富而屋歸于張三事合若符契
試院鶴啄封

萬曆辛卯江西鄉試監臨已入院爲八月
六日而陳幼良與同舍友二人皆在遺棄
束裝欲歸幼良因臀瘡未卽發猶跛曳同

遊院前以不得與試至泣下適院門正送
水菜畢從內封鏤胥吏三封而庭鶴三啄
去監臨訖曰豈外有遺珠乎命啟門視得
幼良三人試之皆佳卽屬藩司給卷並入
試榜發幼良解元一人第三一人第七十
則鶴啄封之力也

水雷繪梅

順治癸巳家蒼叔同雄縣趙卧齋年伯按

閩正月十六過邯鄲途人哄然去看梅花
趙使問花在何處云在呂公祠池中叔父
同衆往觀見祠中左右兩池皆堅冰凝結
右池冰上繪成老梅一本花朵茂盛枝幹
扶疎殆若古樹後見異識資諧載姑蘇韓
某暑月坐堂中命櫛工理髮忽雷電繞柱
奮擊遲回數刻始去某驚死復活見掌中
石砌上繪梅花一枝紋理精妍久而不滅

石中物

堅莫如石宜物無能入者稽神錄載王文
秉祖剖石毬內得蟻螬雲林石譜桂綰剖
石鎮紙內得小魚陶穀破李後主研上圓
石內亦有小魚夷堅志桂陽溫恭剖石中
有龜傳信記載天寶中河北縣開河石中
得古鐵鏟有平陸字命改河北縣爲平陸
縣明孫克弘守漢陽石中得白龜濟寧人

剖石得小鵝嘉靖間茗溪漁人水中得石
如鵝子扣之有聲剖之得銅牌一方刻宣
聖二字鄆縣河灘上有亂石隨手碎之中
有魚長二三寸馮猶龍譚概載成化間澄
河築堤一石中斷中有男女二人作交媾
狀長僅三寸手足肢體皆具若雕刻而成
者高郵衛指揮某得之以獻平江伯陳銳
銳珍藏之

雷鳥雷神

袁小修隨筆載崔封公本智住牛頭里一日天雨落一鳥鴉于墀間童子以雞籠罩之俄而雷電繞室吼怒不已崔曰此必雷鳥也急招道士跪雨中禱告手捧其鳥已而大雷一聲遂失所在雷鳴亦息○康熙乙卯閏五月二十日雷震城隍廟樹有一刷經老人在旁見雷神形與所塑像無異

驚死逾時乃甦

玉脂燈臺

正德初琉球進玉脂燈臺每油兩許可照
十夜光燄鑒人毛髮風雨不能侵劉瑾竊
以自照燈忽發花作人面耳目口鼻皆具
瑾有逆謀以爲已祥乃祝曰大事若成當
封若花忽凋萎作咤噫聲越數尺飛濺瑾
衣汕暈數處氣腥如血滿室晦暗瑾大怒

拔金如意碎之逆謀因之遲回遂至誅滅
陰德不在遠

明長興顧公某宦成無子娶家姬十五人
一日與內君酌諸姬皆侍公歎曰我平生
事皆陰德何以絕我嗣乎一姬曰陰德不
在遠公悟曰我今日行陰德當嫁汝輩姬
曰我豈自言理固如是我死從夫子耳公
盡嫁十餘人已而生三子母卽言死從者

孔孟所使

御史吳時來劾奏嚴分宜父子奸貪誤國
語太激世廟大怒廷鞫問是誰所使吳曰
爲孔子孟子所使又問此是何語曰孔孟
教臣爲臣當忠此是其所使也天顏少霽
得釋戍邊已而詔復職

碁力酒量

白崔外史盛大有年吳下奕手第一遊昆

陵有扶乩請仙者仙至盛請對奕局未半
仙云我已負一子半子奕誠高我將往邀
仙輩中更高者來乩卽寂然盛乃率已意
填補果已勝一子半少頃又一仙來對奕
奕畢盛負一子半仙稱盛奕人間第三手
也盛問仙是天上第幾手仙曰猶是第七
手耳問何仙最高曰惟有南極仙翁天上
無對○雜記載南極仙翁曾在宋元祐時

降靈汴京酒肆與人豪飲酒量無敵是仙翁
基力酒量兩擅其勝矣

兄弟別號

亦巢偶記無錫有兄弟三人長以援例得
官遂別號鵝湖兩弟皆在庠文宗歲試一
考三等將終一考四等人乃呼其兄曰鵝
湖言幾乎劣等也弟曰鵝湖阿鵝吳人呼
痛聲言四等富貴也時傳以爲笑

人腹鼠蟹

漱石閒談金壇鄧某以素封冠其鄉善飲
啖每飯米五升豚肉一肘雞鴨各一隻
雜俎與酒不計大約一飯須數十觔日必
重飡遇逋負者能具豐饌享之輒焚其券
有佃戶負其租數多治具召之鵝爲貓所
食卽殺貓以充雜俎鄧以爲甘而食之此
後卽不能多食矣識者謂其腹有肉鼠鼠

見貓卽死故不能多食也常聞能飲者腹
有酒蟹則善啖者有肉鼠亦無足異肉鼠
酒蟹可爲的對

吳中異人

郡昔有人雙目皆瞽以推命爲生旁無相
者日走蘇城之內外不失尺寸街坊巷陌
無不知之又一人眉目鼻耳俱無面如被
剥止有口且小日於閭門市中吹笛乞錢

度日一人一足不伸一足履地雀躍而行
日走二三十里一婦隻手無十指在機房
繰絲極便捷一人兩手俱無以足指與人
搏錢收錢時雖疾手者不若也

圓珠殼

說圃識餘崑山田嫗家傳一簋箕大如五
斗益日以播米輕而質堅如牛皮然有耳
目形罔知何物有一商見之以銀一星欲

買姬不可曰此吾家傳六七世不忍棄之
商乃酬米一石得之熟玩以爲蝦蟇殼終
不知其所用至陝西秦王府求售秦王大
驚卽誅千金商高其價乃至五千金秦王
笑曰爾雖得我厚價知其何寶乎商叩頭
謝曰不知王曰此殼能圓珠珠之凹凸不
正者一經殼中滾之則其形圓如茨粒此
不世奇珍也爾何從得之商乃悉其故

楊鐵崖

楊鐵崖云吾未七十休官在九峰三泖間
且二十年優游光景過於樂天有李峰張
句曲周易痴錢思復爲倡和友桃葉柳枝
瓊花翠羽爲歌歛妓第池臺花月主者乏
晉公耳然東諸侯如李越州張吳興韓公
江鍾海鹽聲伎高宴余未嘗不居其右席
則池臺主者未嘗乏也風日好時駕春水

宅航舄赴吳越間好事者招致效昔人水
仙舫故事蕩漾湖光島翠望之呼鐵龍仙
伯顧未知香山老人有此無也客有小海
生賀公爲江山風月福人且貌公老像以
八字字之又賦詩其上曰二十四考中書
令三百六字太師銜不如八字神仙福風
月湖山一擔擔

盆景

虎丘張豫園善藝植一盆景剔牙松結構
古雅崑山張維惠見之議百金易得交旣
成將移松登舟張老泣然淚下曰培護幾
十年今永別矣維惠慰之曰痴老子汝若
思松玉峯一棹可達也持歸以人參汁澆
之稍黃萎建醪籙以所佑雖傳笑一時然
清狂可以不朽

石號

鄭龍如偶記四川南江縣自建邑來無鄉
舉者嘉靖末堪輿家以前山巨石爲崇令
鑿去之鳩工殫日石屹不動其夜石號曰
邑無佳士遲二十年有可當賢書者我方
自去人力其若我何詰朝視之復如故遂
罷工至萬曆壬午諸生岳虞詢始舉鄉薦
前一夕石復語曰今有人我須去矣翌日
石自隕捷音果至虞詢後舉壬辰進士